



KENYATAAN MEDIA

YB DATO SRI DR. HAJI WAN JUNAIDI BIN TUANKU JAAFAR
MENTERI SUMBER ASLI DAN ALAM SEKITAR

STATUS KES PEMBAKARAN TERBUKA

Sebanyak 2262 kes kebakaran terbuka telah dikesan oleh Jabatan Alam Sekitar (JAS) di seluruh negara dari bulan Januari hingga 20 Ogos 2016. Kes-kes pembakaran terbuka pembakaran terbuka terbabit melibatkan kawasan hutan (300 kes), kawasan belukar (515 kes), tapak pembinaan (48 kes), tapak pelupusan (70 kes), industri (15 kes), pertanian (589 kes) serta lain-lain kes pembakaran terbuka kecil (725 kes).

Jabatan Alam Sekitar (JAS) masih memantau rapi status kualiti udara di seluruh negara berikutan kejadian jerebu masih tidak menentu. Titik-titik panas (*hotspots*) di Sumatera dan Kalimantan, Indonesia yang masih aktif boleh menyebabkan pencemaran jerebu merentas sempadan berterusan ke Pantai Barat Semenanjung Malaysia dan ke negeri Sarawak.

JAS telah mempertingkatkan usaha-usaha pencegahan ke atas aktiviti pembakaran terbuka yang berpotensi menyebabkan jerebu di peringkat tempatan. Antara tindakan yang telah dilaksanakan oleh JAS adalah seperti berikut:

- a) Mengaktifkan **Pelan Tindakan Pencegahan Pembakaran Terbuka** di seluruh negara mulai 12 Januari 2016. Ia meliputi aktiviti-aktiviti rondaan darat bagi tujuan pemantauan dan penguatkuasaan

terutamanya ke kawasan-kawasan yang telah dikenalpasti mudah terbakar, tindakan mahkamah bagi kes-kes pembakaran terbuka di kawasan tapak binaan, industri dan ladang manakala bagi kes-kes pembakaran terbuka yang kecil tindakan kompaun akan dikenakan; mengeluarkan secara serentak surat-surat arahan kepada Pihak Berkuasa Tempatan (PBT) yang bertanggungjawab ke atas tapak pelupusan sampah supaya mengambil langkah pencegahan serta sentiasa mengawal rapi dan memastikan tapak-tapak pelupusan tidak terbakar bagi mengelakkan jerebu, mempertingkatkan kempen-kempen kesedaran khususnya melalui radio tempatan bagi mengingatkan orang ramai untuk tidak melakukan pembakaran terbuka, penglibatan masyarakat setempat melalui Program Pasukan Pemantau Pencemaran (3P) bagi membantu memantau kes-kes pembakaran terbuka dan memperkemaskan sistem dan saluran komunikasi penerimaan aduan pembakaran terbuka dari orang ramai;

- b) Mengaktifkan **Pelan Tindakan Mencegah Pembakaran Terbuka Ketika Musim Panas Dan Kering Di Kawasan Ladang Dan Sektor Pertanian** mulai 20 Januari 2016. Pengaktifan pelan tindakan ini melibatkan kerjasama Kementerian Pertanian Malaysia (MoA) dan Kementerian Perusahaan, Perladangan Dan Komoditi (MPIC) dalam melaksanakan langkah-langkah pencegahan kes pembakaran terbuka di kawasan perladangan dan sektor pertanian terutamanya semasa musim panas dan kering;
- c) Memantau rapi kawasan-kawasan tanah gambut yang sering terbakar melalui pengaktifan **Prosedur Tetap Operasi (PTO) Program Pencegahan dan Pengurusan Tanah Gambut Sering Terbakar**;
- d) Penguatkuasaan semasa musim panas dan kering dipertingkatkan ke atas punca-punca pencemaran udara yang lain iaitu pelepasan asap dari kenderaan bermotor, pelepasan habuk dari kerja-kerja tanah dan pelepasan asap dari premis industri; dan

- e) Pemantauan melalui udara (*aerial surveillance*) dilaksanakan bagi mencegah kebakaran hutan terutama di kawasan sering terbakar dan kawasan pedalaman yang berisiko tinggi berlaku kebakaran.

Untuk tidak memburukkan keadaan berjerebu, semua pihak terus diingatkan agar tidak melakukan pembakaran terbuka atau membiarkan tanah atau premis kepunyaan mereka dimasuki atau dicerobohi oleh pihak-pihak yang tidak bertanggungjawab sehingga menyebabkan pembakaran terbuka untuk tujuan tertentu atau dengan tidak sengaja.

Menurut Seksyen 29(A), Akta Kualiti Alam Sekeliling 1974, mereka yang disabitkan dengan kesalahan melakukan pembakaran terbuka boleh dikenakan denda tidak melebihi RM500,000 atau penjara selama tempoh tidak melebihi 5 tahun atau kedua-duanya sekali. Kompaun maksimum sebanyak RM2000 juga boleh dikenakan atas setiap kesalahan.

Sebagai agensi penguatkuasaan yang komited dan tegas dalam menjalankan tugas penguatkuasaan, JAS telah mengeluarkan kompaun untuk 208 kes dengan jumlah kompaun yang dikutip sebanyak RM233,566.00. Kes pembakaran terbuka yang telah diberikan surat arahan ialah sebanyak 21 kes, 29 kes diberikan notis arahan, manakala 15 kes dalam proses penyediaan kertas siasatan untuk tindakan mahkamah bagi tempoh dari Januari hingga Ogos 2016.

Orang ramai juga diminta bekerjasama untuk memadam kebakaran-kebakaran kecil dan juga melaporkan kes-kes pembakaran terbuka atau kebakaran kepada Jabatan Perkhidmatan Bomba dan Penyelamat di talian **999** dan Jabatan Alam Sekitar (JAS) di talian bebas tol, **1-800-88-2727**.

KEMENTERIAN SUMBER ASLI DAN ALAM SEKITAR
21 OGOS 2016